

UDAZKENEAN EGINGO DA BARNE MINISTERIOKO ARDURADUN OHIEN KONTRAKO EPAIKETA

CESIDen agiririk gabe itxi du Monerrek GALen sumarioa

■ 'GAL kasuaren' ikerketa amaitutzat jo du Eduardo Moner Auzitegi Goreneko epaileak, desklasifikatuko diren CESIDen agiriak jaso arte itxaron gabe. Bigarren Salaren esku utzi du sumarioa, Barne Ministerioko arduradun ohien kontrako epaiketa presta dezan.

Agentziak / Madril

EDUARDO MONERREK, GALen sumario nagusia eraman duen epaile instruktoreak, itxi egin du ikerketa. Egin beharreko diligentsia guztiak egin dituela eta elementu garrantzitsu berririk ez dagoela azaldu du.

Auto judiziala kaleratu zuen atzo Monerrek eta kasua amaitutzat jo. Espero zen erabaki hori, baina joan den hilean Auzitegi Gorenak CESIDen agiriak desklasifikatu egin behar direla ebazti eta gero, agian Monerrek agiri horietako batzuk eskatuko zituela pentsatzen zen. Epaileak, ordea, ez deritzo beharrezko agiriak prozesura gehitzeari.

GAL kasuko herri akusazioak eta Francisco Alvarez komisiarioaren abokatuak eskatu zuten hasiera batean CESIDen agiri sekretuetako batzuk sumarioan sartzeko, baina artean desklasifikatu gabe zeudela-eta, Monerrek ez zuen eskaera bideratu ere egin. Auzitegi Goreneko Hirugarren Salak desklasifikazioaren aldeko erabakia hartu ondoren, kasua zabalik izateko eskatu zion Alvarezen abokatuak Monerri, CESIDen agiriak gehitzeko aukera izateko. Epaileak ez du eskaera aintzatzat hartu.

Gainera, ez du onartu Margarita Robles Barneko Estatu idazkari ohiak lekuko gisa deklaratzeari. Epailearen ustez, ez da baliagarria, eta epaiketa atzeratzeko baino ez luke balioko. «Beharrezko eta egoki ikusi diren diligentsia guztiak egin dira, eta ez dago instruktorearen garrantzitsua den



Eduardo Monerrek ez zuen instrukzioan Gonzalez auzipetzeko arrazoirik ikusi.

EFE

elementu gehiago», dio Monerrek atzo kaleratu zuen autoan.

Beraz, kausa epaitzeko prest dagoela ondorioztatu du epaileak, eta epaituko duen Auzitegi Goreneko Bigarren Salaren esku utzi ditu diligentsiak. Epaiketa udazkenean egingo da ia seguru, eta iraila eta urria aipatu izan dira.

Dena den, aurrez zenbait eskaeraz erabaki beharko du Bigarren Salak, Monerrek atzera bota baina herri akusazioak errekurritu zituenak: desklasifikatuko diren CESIDen agiriak gehienak kasura ekarri ala ez, eta Eduardo

Serra Defentsa ministroa deklaratzera deitu ala ez. Bigarren Salak eskaera horietako bat onartuko balu, Monerrek atzera zabaldu beharko luke sumarioa, diligentsia horiek egiteko.

Bestalde, kasuko aldeak eta auzipetu guztiak hamabost eguneko epean Auzitegi Goreneari aurkezteko agindu du Monerrek, erabakiaren berri jaso dezaten. Aldi berean, Frederico Trillo Kongresuko lehendakariari auto judizialaren kopia bat igorri dio, auzipetuetako bat Jose Barrio-nuevo diputatu sozialista delako.

Harekin batera hauexek epaituko dituzte, Segundo Mareyren bahiketarekin eta GALen sorrerarekin zerikusia dutelakoan: Rafael Vera, Segurtasunerako Estatu idazkari ohia; Julian Sancristobal, Segurtasun zuzendari nagusi ohia; Francisco Alvarez, Borroka Antiterroristako Agente Bakarreko buru ohia; Ricardo Garcia Danborenea, Bizkaiko PSE-PSOEko idazkari nagusi ohia; eta beste zenbait arduradun polizial. Baliteke Felipe Gonzalez Gobernuako presidente ohiak lekuko gisa deklaratzeari. X

Auzitegi Nagusiko fiskalburuak HBren kontrako salaketa aurkeztu du

■ «Espainia iraindu izana» leporatzen dio Cardenalek Mahai Nazionalari

Vasco Press / Bilbo

JESUS CARDENAL-EK, Euskal Autonomia Elkarteak Justizia Auzitegi Nagusiko fiskalburuak, salaketa aurkeztu du Herri Batasunako Mahai Nazionalaren kontra, ustez «Espainia iraindu» delako. Delitu hori leporatzeko, Egin egunkarian «Espainia hiltzailea» mezuarekin HBk sinaturik agertu ziren iragarkiak hartu ditu oinarrian fiskalburuak. Iragarki horiek martxoaren 30 eta 31n argitaratu ziren, Josu Zabala eta kidearen omenaldirako deialdia egiteko. «Espainia hiltzailea!» mezuarekin batera, «Euskal Herriak ez du barkatuko!» zioen iragarriak.

Hori dela eta, Jesus Cardenal fiskalburuak salaketa ipini du Herri Batasunako Mahai Nazionalaren aurka Auzitegi Nagusiko Gizarte eta Zigor Epaitegian, deialdiaren erantzule nor den argitzeko asmoz. Salaketaren oinarrian Kode Penalaren 543. artikulua dagoela jakinarazi zuen Cardenalek. Artikulu horrek dio Espainia, bertako komunitate autonomoak eta ikurrak hitzez edo egitez iragarki bidez iraintzea zazpiti hamabi hilabetera bitarteko isunarekin zigortuta dagoela.

Bestalde, Julen Zelarain AABetako bozeramailearen adierazpenen kontra ez du salaketarik jarriko Cardenalek, «adierazpen horiek EAEko Justizia mugabarrutik kanpora egin zirelako», zehaztu zuen fiskalburuak. Julen Zelarainek Josu Zabala Estatuko segurtasun indarrek hil zutela esan zuen Etxarri-Aranatzen emandako prentsurrekoan, eta haren hilotzak Zabala «Estatu krimen baten biktima» dela pentsarazten duela gaineratu. Adierazpenok aztertzeko asmoa du Nafarroako Auzitegi Nagusiko Fiskaltzak. X

Fiskalak hiru urteko zigorra eskatuko du Otegirentzat ertzain bati erasotzeagatik

■ Auzi hori dela eta, ekainaren 10ean epaituko dute Itsasondoko gaztea

Efe / Donostia

EKAINAREN 10ean epaituko dute Mikel Otegi gaztea, 1995eko abenduaren 10ean Itsasondoko taberna batean ustez kalerako jantziriko ertzain bati erasotzeagatik. Otegiak baserrian bi ertzain hil baino lehen izan zen istilu hori, eta fiskalak atentatua leporatuta hiru urteko espetxe zigorra eskatu du: 1994an intsumiso izateagatik urtebeteko espetxe zigorra ezarri ziotenez, larrigarria aplikatu baitio lehen delitua ez izateagatik. Aldi berean, ertzainaren autoan eragin kalteak ordaintzea eta ertzainari, jasotako tratu txaragatik, 3.000 pezeta ordaintzea nahi du fiskalak.

Fiskalak bere idatzian eginiko

kontaketaren arabera, 1995eko abenduaren 10eko goizean, Mikel Otegi Itsasondoko Ibarre tabernan zegoela, ertzain bat sartu zen. Uniformerik ez bazeraman ere, Otegi Ertzaintzako kide zela bazekiela dio fiskalak. «Ertzaina gutxiesteko asmoz, 'mozkor zaitetz, kanpoan nik egingo dizut alkoholemia eta' eta antzeko esaldiak esan zizkion, baina ertzainak ez zuen erantzun», fiskalak dioenez. Ministerio publikoko ordezkariaren hitzetan, ertzaina, egin beharrekoak amaitu ostean, kalera irten zen, eta han Mikel Otegi zuen zain. Gazte itsasondorarrak «zipaio, putakumea» esan zion ertzainari eta aurpegian ukabildkada bat eman zion. Ondoren, ertzaina autoan sartu zen eta

alde egin baino lehen akusatuak hainbat ostiko eman zizkion autoari.

Otegiren aurkako neurriei ezarri errekurtsua baztertua

■ Mikel Otegi, bi ertzain hiltzeaz absolutu zutenean, pasaportea jasotzeko eskaera egin zuen, baina, oraindik epaiketa hau egiteke zegoenez, fiskalak gazteak ez ihes egiteko behin behinako neurriak eskatu zituen. Epaileak pasaportea ukatzea eta astero Itsasondoko bake epaitegian aurkezteko agindua eman zuen. Erabaki horren aurka Miguel Castells defentsako abokatuak errekurtsua aurkeztu zuen. Horretan hiru arrazoi aipatzen zituen, batetik, pasaportea izatea

eskubide konstituzionala dela, bestetik, prozedura akatsak zeudela eta azkenik, Itsasondoko Otegiren aurka «hilko zara» zioten pintaketak azaldu zirenez astero epaitegira joatea arriskutsua izan zitekeela. Epaileak, ordea, errekurtsua baztertu du. X

EUSKO JAURLARITZA

HEZKUNTZA, UNIBERTSITATE ETA IKERKETA SAILA

GOBIERNO VASCO

DEPARTAMENTO DE EDUCACION, UNIVERSIDADES E INVESTIGACION

ESKOLA-GRADUATU TITULUA LORTZEKO HELDUTASUN-PROBEN DEIALDIA

1997ko otsailaren 3ko Erabakian (otsailak 19ko EHAAn), 1994 apirilaren 11ko Agindua garatuz (apirilak 26 EHAAn), 1996ko abenduaren 31n baino lehenago hamalau urte beteta dutenarentzako eskola-graduatuaren titulua lortzeko heldutasun-probetarako deia egiten da.

Erabaki horrek, izenematea apirilaren 11tik 30arte egin behar dela dio, Hezkuntzako Lurralde Ordezkaritzetan.

Informazio gehiago jaso nahi dutenek Hezkuntzako Lurralde Ordezkaritzetan jaso dezakete.

PEDAGOGI BERRIKUNTZARAKO ZUZENDARITZA